

29 MAY 2001

PRESIDEN VENEZUELA JUMPA MAHATHIR DI PUTRAJAYA

PUTRAJAYA, 29 Mei (Bernama) -- Datuk Seri Dr Mahathir Mohamad mengadakan pertemuan sejam dengan Presiden Venezuela Hugo Chavez di pejabat Perdana Menteri di sini hari ini.

Ketibaan Chavez pada 12.15 tengah hari disambut oleh Dr Mahathir.

Fokus perbincangan kedua-dua pemimpin itu adalah mengenai usaha meningkatkan perhubungan antara Kuala Lumpur dan Caracas.

Ini adalah lawatan kedua pemimpin Venezuela itu ke Malaysia selepas lawatan pertama pada Oktober 1999.

Antara 30 anggota rombongan presiden itu ialah Menteri Luar Kol. Luis Alfonso Davila, Menteri Sains dan Teknologi Dr Carlos Genatios dan Menteri Perancangan dan Pembangunan Dr Jorge Giordani serta sekumpulan ahli perniagaan.

Selepas pertemuan itu, Chavez dan rombongannya berlepas ke Seri Perdana untuk jamuan tengah hari bersama Dr Mahathir.

Presiden Venezuela itu akan menamatkan lawatan dua harinya dengan berlepas ke Jakarta petang ini untuk menghadiri Sidang Kemuncak Kumpulan 15 Negara Membangun (G15) yang akan bermula esok.

-- BERNAMA

NZ MAM MOZ